

Porodice djece i osoba sa poteškoćama u razvoju, još od momenta prvih suočavanja sa specifičnostima djeteta i nadalje, u različitim kasnijim životnim situacijama, suočavaju se sa brojnim izazovima i izloženi su posebnom pritisku i riziku, često ne znajući kako i na koji način da se suoče sa barijerama oko sebe, te kako da iznađu adekvatna rješenja za brojna pitanja, nedoumice i obaveze koja im se svakodnevno nameću.

Svakodnevno su suočeni sa nemogućnošću ostvarivanja osnovnih ljudskih prava, zbog nepostojanja ustanova gdje bi konkretno pravo mogli ostvariti i koja će im pružiti zaštitu i podršku, a u isto vrijeme dati jasne upute i mehanizme za ostvarivanje istog.

Ono sa čim se porodice svakodnevno susreću odnosi se na: brojne izazove u društvu koje (ne)prihvata različitosti, porodice su izložene posebnom pritisku i riziku, sa nemogućnošću njihovog savladavanja, neravnopravnim statusom građana djece i osoba koje imaju poteškoće u razvoju, nerazvijenost servisa podrške uzrokuje dodatnu izolaciju i narušava prava djece/osoba sa poteškoćama u razvoju i njihovih porodica, nedostatak podrške od samog početka, usljed nedostatka informacija, porodice se često osjećaju bespomoćno, nepristupačni i neprilagođeni javni prostori, odbijanje i isključivanje porodica iz društva, predrasude, diskriminacija, neprihvatanje, nezaposlenost, izolacija, nizak ekonomsko-socijalni status, porodice nerijetko postaju socijalni slučaj i „teret države“.

Iz tih razloga porodici koja ima člana dijete/osobu sa poteškoćama u razvoju neophodno je pružiti širok spektar usluga koje će kroz sistem omogućiti im da žive, rastu i razvijaju se kao tipične porodice, pružiti im zaštitu i omogućiti ostvarivanje njihovih prava u praksi.

U vezi sa naprijed navedenim a na osnovu člana 1.alineje 1 i 4 Zakona o socijalnoj zaštiti, zaštiti civilnih žrtava rata i zaštiti porodice sa djecom, kojim se između ostalog uređuju pitanja djelatnosti socijalne zaštite, zaštite civilnih

žrtava rata i zaštite porodice sa djecom, te uvjeti, način, postupak ostvarivanja prava i finansiranje osnovnih prava porodice sa djecom utvrđenih Federalnim zakonom i ovim zakonom, u vezi sa poglavljem VI istog Zakona koji se odnosi na zaštitu porodice sa djecom, pozivajući se na neophodnost i svrhu postojanja i osnivanja udruženja koja će pružati pomoć i podršku porodicama djece i osoba sa poteškoćama u razvoju, na području Kantona Sarajevo, podnosim:

## **INICIJATIVU**

za izmjene i dopune Zakona o socijalnoj zaštiti, zaštiti civilnih žrtava rata i zaštiti porodice sa djecom

- Da se izmijeni glava VI Zakona, koja se odnosi na Zaštitu porodice sa djecom i to:

Da se formira posebna tačka 10. Zakona koja će glasiti:

### **10. Prava i zaštita porodica djece i osoba sa poteškoćama u razvoju**

a koja će obuhvatati slijedeće članove:

#### **Član 169.**

Porodice djece i osoba sa poteškoćama u razvoju ostvaruju po ovom Zakonu pravo na socijalnu i porodičnu zaštitu.

Ova prava porodice djece i osoba sa poteškoćama u razvoju ostvaruju kroz pružanje usluga koje podrazumijevaju: stručni rad sa djecom i osobama sa poteškoćama u razvoju, psihološku podršku i pomoć porodicama, informativno-pravnu pomoć, pomoć u kriznim situacijama, edukativne i kreativne radionice, pomoć i podrška porodicama na terenu.

#### **Član 170.**

Prava porodica djece i osoba sa poteškoćama u razvoju ostvaruju se na osnovu ovog Zakona, a putem Službi za socijalnu zaštitu Kantona Sarajevo.

## Član 171.

Porodice djece i osoba sa poteškoćama u razvoju se putem Centra za socijalni rad upućuju u ustanove, udruženja, servise podrške, pod uvjetom da se radi o pravnim subjektima koji su registrovani za rad i pružanje usluga porodicama koje imaju člana dijete ili osobu sa poteškoćama u razvoju.

Sa institucijama iz stava 1.ovog člana Centar mora imati sklopljen memorandum ili protokol o saradnji, u kojem su definisana međusobna prava i obaveze.

Zastupnik BPS-a u Skupštini *kd / 0*  
Semir Halilović

Sarajevo, 31.10.11